


Doxcomz Gwnz Ronghndwen

相聚月亮上

环江思恩镇西南小学 韦佳



Siujoyz bizyez seiz, gyoengq doengzhag itheij iekdingh: Ngeihcib bi le youq gwnz ronghndwen doxcomz. Vihliux saedyienh aen siengmuengh neix, gou roengzrengz doegsaw, youq guek raeuz aen dayoz mizmingz ndeu gauj ndaej bozsw yozvei le, ciepdwk youh ok guekrog bae doegsaw, hag sat le, couh bae gwnz ronghndwen cauh mbanjronghndwen. Ginggvaq gou caeuq daengx aen danhvei doengzdoh itheij roengzrengz, dauqdaej guh baenz aen mbanjronghndwen lo.

Seizgan gvaq ndaej caen vaiq ha, baez yaepda, ngeihcib bi

gaxgonq iekdingh haenx couh daengz lo. Ngoenzhaenx, gou lij loq fangzhwnz, sing “hwnqcong lo, bouxcawj” sawj gou daj ndaw loq fangzhwnz ndiu gvaqdaej, yenzlaiz dwg boux vunzgihi heuh gou hwnqcong lo. Gou fwt siengj daengz: Ngoenzneix dwg gyoengq doengzhag youq gwnz ronghndwen doxcomz, gou baenzlawz ndaej lumz ne? Gou muengz dwk swiq naj, daenj buh, gwn ngaizhaet, couh naengh hwnj feihconz mbin bae gwnz ronghndwen. Gou daeujdaengz gwnz gvangjangz mbanjronghndwen, gizneix mbwn lamz-

cupcup, nywj heusausau……

Gyoengq doengzhag cungj daeujdaengz mbanjronghndwen lo. Dou mienh byaij mienh yawj, gizneix gak cungj doenghgo caeuq gwnz digiuz ityiengh, mbaw heu va hoengz, maj ndaej mwncup. Ranz gizneix mbouj sang, gojyij yawj daengz gig gyae. Gizgyae dwg naz heuloeg yawj mbouj raen henz, gizgyawj dwg raemxmboq bauq ok, sawndikndik. Diegneix caeuq gwnz digiuz miz di mbouj doengz, couhdwg gwnz mbanjronghndwen cungj dwg seizcin, dienheiq raeujrub, hoengheiq singsien.

Gyoengq doengzhag youq ndaw fanden gwn ngaizhaemh, daihgva angqvauvau gangj ngeihcib bi daeuj gak boux guh le gijmaz, miz mbanj guh gaujguj, miz mbanj yenzgiu raemxhaij bienq damh, miz mbanj yenzgiu hawj sahmoz maj doenghgo bienq loeg…… Daihgva guhhong cungj dwg vihliux vunzloih fazcanj caeuq cinbu ha! Dou gangj dwk, riu dwk, miz vah gangj mbouj liux, miz cingz lwnh mbouj sat.

Seizgan yaepda couh gvaqbae lo, daihgva mbouj ndaej mbouj doxbiek. Youq seiz doxbiek, daihgva caez iekdingh baezlaeng caiq doxcomz. Gou siengsaenq baezlaeng doxcomz engq miz eiqsei.

(指导老师:罗少维)



Duz Ma'iq Gou

我的小狗

武宣县实验小学二(六)班 甘宝菊

Daxboh cawx duz ma'iq ndeu hawj gou.

Duz ma'iq neix daengx ndang bwn hausagsag raezramram yungzyubub, doiq rwz raezramram bupbebbbe duengh roengzdaej, doiq lwgda iqetet de ndaemndi' ndi ronghrikrik, ciengzseiz ndoj youq ndaw bwnyungz raezram, mbouj sijsaeq yawj lij yawj mbouj raen ne. Duzde maij buet maij foux, baez buet hwnjdaej, yawj gvaqbae couh lumj aen giuznae nei ringxgingging.

Seizgan nanz le, ma'iq couh caeuq gou doxndei lo, songdou baenz doiq baengzyoux ndei ndeu lo. Moix baez gou bae hwnjhag, ma'iq cungj soengq gou okdou gig gyae, lumjnaeuz mbouj sijndaej hawj gou okdou nei. Seiz gou cuengqhag dauqma, ma'iq maeuq youq henz bakdou caj gou, baez raen gou couh buet gvaqdaej, baet rieng vadvad, doq iet linx myabriz din gou, doq sing daemq raeuq “ngaengngaeng” geij sing, lumj dwg gangjnaeuz: “Bouxcawj iq ha, mwngz cungjsuenq dauqma lo, gou siengj mwngz lai lo!”

Duz ma'iq gou caen dwggyaez ha, gou gyaez duz ma'iq gou.

(指导老师 甘说文)

Duzmax Caeuq Bouxdwknyaen

马和猎人

环江思恩镇西南小学六年级 罗晓松



Doenghbaez, miz roek duz max itheij youq ndaw bya gvaq saedceij. Ndaw bya diuzgen gig rwix, mbouj miz raemx caeuq nywj hawj roek duz max neix gwn. Ndigah, roek duz max neix gietdingh lizhai dieg neix, lingh bae ra gaiq dieg ndei ndeu gvaq saedceij.

Ngoenz ndeu haetromh, roek duz max neix hainduj biek ndaw bya bae giz wnq lo. Gyoengqde cingq byaij youq gwnz diuz loh iq ndeu, sawqmwh, cienz daeuj sing

cungq yiengj, yaepyet, roek duz max neix luenh lo. Miz mbanj luenh buet, deng laemx sieng lo; miz mbanj deng cungq nyingz sieng; miz mbanj deng cag lamh ga, byaij mbouj ndaej lo. Cijmiz duz max hoengzgeq ndeu mbouj deng gaeb, de yawjraen gyoengq beixnuengx deng sieng, deng gaeb, ndawsim gig nanzgvaq. Seizhaenx, bouxdwknyaen gwed gaiqcungq daj laeng gofaex okdaej, duzmax hoengzgeq raen le, gipmuengz buet haiej ndaw gumz nywj bae. Bouxdwknyaen ra bae ra dauq, baenzlawz hix ra mbouj raen duz max hoengzgeq neix. Gvaq le haujlai nanz, bouxdwknyaen gietdingh mbouj ra duzmax hoengzgeq lo. Bouxdwknyaen cingq rag haj duz max cunjbei dauqma, duzmax hoengz-

geq fatyienh youq henz de ndoj haenx miz aen congh laeg ndeu, de couh naemj ok le aen banhfap ndei ndeu: Yinx bouxdwknyaen gvaqdaej hawj de doek roengz ndaw congh bae. Duzmax hoengzgeq gaemdawz ndaek rin ndeu, ndek coh bouxdwknyaen, cingq ndek deng gwnz gyaeuj bouxdwknyaen. Bouxdwknyaen ndatheiq raixcaix, couh byaij gvaq henz gumz nywj bae yawj, sawqmwh doek roengz ndaw congh bae lo, baenzlawz hix okdaej mbouj ndaej lo. Yienghneix, duzmax hoengzgeq haenx couh gouq ndaej beixnuengx de lo.

Daj seizhaenx hwnj, gyoengq duzmax couh ndaej vaiqvued youq ndaw ndoengfaex gvaq saedceij lo.

(指导老师:罗凤)

Haizmoq Gou

新鞋子

德保县隆桑镇中心校 王叶潇

Bi moq yaek daengz lo, daxmeh caeux couh bang gou senj ndei buhmoq lo, de youq gwnz vangj cawx hawj gou song dauq buhvaq moq, hoeng lij miz gouh haizmoq ndeu caengz ndaej cawx.

Daengz ngoenz singhgiz lo, daxmeh couh daiq gou bae haw cawx haizmoq. Daeujdaengz bouq gai haizlwgnyez, ai, haiz caen lai ha, gou yawj daengz dava bae. Gou byaengqda sijsaeq bae senj, yaep ndeu couh deng gouh haizhau najhaiz sang gyaeunde ndeu yinx gvaqbae lo. Gouh haiz neix seiqhenz dwg saek hau, cungqgyang dwg saek ndaem, gwnzde lij miz song duj vahoengz, ndei yawj raixcaix! Gou baez sawq daenj, cingq hab din, gou gig gyaez gouh haiz neix, daxmeh couh cawx hawj gou lo.

Dauqma daengz ranz, daxmeh doiq gou naeuz, daenj haizmoq couh daiyauj yaek byaij lohmoq. Gou dingq le, sim siengj, youq bi moq neix, gou aeu enggya roengzrengz hagsib, ceng' aeu engq ndei cingzcik.

(指导老师:王安克)